

兵部

綠營處分例

欽定大清會典事例

卷

六百二十三至
六百二十五

欽定大清會典事例卷六百二十三

兵部

綠營處分例

守衛

營伍

守衛○原定

陵寢有關風水地方。豎立紅椿。外留火道二十丈。禁止樵採種地。守口弁兵不時巡查。如有縱民犯禁及自犯禁限者。照違

制律從重治罪。如該管上司失察弁兵縱民樵採。降一級調用。失察弁兵自行犯禁樵採。降二級調用。其火道以外。聽民自便。各口樵採種地民人。

領取地方官印票。守口官弁驗票放行。按季報部查覈。如有夾帶違禁貨物。守口官弁明知故縱者。革職。失察者降一級調用。其給票驗票書役兵丁。有需索等弊者。照關津留難律治罪。賊重者計贓。以枉法從重論。○又定。承德府屬地方民人。潛入圍場。偷砍打牲。經圍場總管拏獲。即會同該州縣等查辦。將失察之該管都司守備千總把總等官。一年內失察在三案以內。每案罰俸六月。如至四案以上者。自第四案起。每案降一級留任。該管副將失察在三案以內者。

免議四案以上者。自第四案起。每案罰俸一年。
僮該員弁有能拏獲鄰汛偷砍打牲人犯者。每
一案紀錄一次。拏獲本汛偷砍打牲人犯。每二
案紀錄一次。○嘉慶十二年定。

陵寢後龍風水禁內。竊賊潛入。偷砍海樹。本汛官兵疏
於巡查。經鄰汛官兵拏獲者。將本汛專管官革
職。兼轄統轄各官降二級調用。兵丁責革。其竊
賊潛入。並未傷損樹株。經別汛官兵拏獲者。將
專管官降三級調用。兼轄統轄各官降一級調
用。兵丁責革。如將海樹偷出禁外。別經發覺者。

專管官革職。兵丁革退。一併治罪。兼轄統轄各官革職。總兵降二級調用。○又定。

陵寢後龍風水禁內。盜賊潛入。並未傷損樹株。即由本汛官拏獲首犯者。給予紀錄二次。拏獲夥犯一二名者。紀錄一次。拏獲三名以上者。紀錄二次。兵丁首先拏獲首犯者。賞銀八兩。幫同拏獲者。賞銀四兩。拏獲夥犯一二名者。賞銀四兩。拏獲三名以上者。賞銀八兩。幫同拏獲者。減半賞給。若本汛樹株已被盜砍之後。該管官兵始將賊犯捕獲者。以功抵罪。免其查議。毋庸升賞。至鄰

汛官兵。能於隔汛地界。將賊犯拏獲。而樹株尚未被砍者。拏獲首犯。給予加一級。拏獲夥犯一名。紀錄一次。按名遞加。兵丁首先拏獲首犯者。賞銀十兩。記大功一次。幫同拏獲者。賞銀五兩。記功一次。拏獲夥犯一二名者。賞銀五兩。拏犯三名以上者。賞銀十兩。幫同拏獲者。減半賞給。若本汛官兵疏於防範。樹株已被盜砍。而鄰汛官兵能將首夥各犯查拏就獲者。應逾格優獎。拏獲首犯者。以應升之缺。即行升用。先換頂戴。拏獲夥犯一二名者。給予加一級。拏獲三名以

上者。加二級。兵丁首先拏獲首犯者。賞銀十六兩。以外委拔補。幫同拏獲者。賞銀六兩。記大功一次。拏獲夥犯一二名者。賞銀六兩。記功一次。拏獲三名以上者。賞銀十二兩。幫同拏獲者。減半賞給。其奉文派委巡查之官。如能緝捕賊犯者。應查明指派汎地與拏獲處所。亦分別本汎鄰汎樹株已砍未砍。比照一律升賞。如有妄拏者。即照妄拏平民例治罪。○又定。

陵寢禁地紅椿界內。及白椿青椿界內。遇有回乾風折樹株。該營汎官弁。隨時報明上司。轉報該管大

臣勘驗登記。咨報禮工二部。及承辦衙門。遇修整火道內撥房橋梁等項。酌量取用。如有不敷。於青椿外尋覓採取。儻有在青椿內擅行翦伐。及匿報者。該大臣等叅奏。將該管官兵治罪。上司分別懲處。○十五年奉

旨。軍機大臣會同刑部議奏。私入圍場偷竊牲隻砍伐木植人犯罪名一摺。此等人犯潛入圍場。於牲獸木植。私行偷竊。並竊取茸角。不可不嚴行禁止。該犯等多係圍場外附近居民及蒙古人等。該管官若查拏嚴密。自不致姦民屢干例禁。嗣後拏獲此等人犯。如

審係附近圍場外居民。將該管廳縣議處。如係蒙古。將該管札薩克議處。其如何立定處分。著原議軍機大臣會同該衙門詳議具奏。至圍場北柵外向有開設店鋪。自係該民人貪利。在彼窩竊茸角等項。亦應嚴行驅逐。此後相去柵口若干里。方准開設之處。著一併議奏。○又定。圍場南面西面地方。係灤平豐甯二縣。及承德府管轄。由東南迤邐至北面係喀喇沁。翁牛特。巴林。蒙古旗地。其民人屬平泉州。赤峯縣管轄。北面係克什克騰。蒙古旗地。西北面係察哈爾。正藍旗地。該處民人。東附於赤峯。

縣。西附於多倫諾爾廳。如承德府屬地方民人及圍場附近居民。有潛入圍場偷打牲獸盜砍木植。經圍場總管拏獲者。失察之該管地方都司守備千總把總等官。按人犯之罪名輕重議處。如一案內有首從各犯。按首犯應擬之罪名議處。人犯罪應擬徒者。該管官罰俸六月。人犯罪應擬流者。該管官罰俸一年。人犯應發烏魯木齊等處種地者。該管官降一級留任。人犯應發烏魯木齊等處給兵丁為奴者。該管官降一級調用。該管副將於所屬失察。僅止罰俸者。免

其處分。若屬員例應降級者。罰俸一年。儻該員
弁有能拏獲鄰汛偷砍打牲人犯者。每一案紀
錄一次。如拏獲本汛偷砍打牲人犯者。每二案
紀錄一次。蒙古札薩克察哈爾等處賊犯。有從
承德府屬武職該管汛地潛入圍場。偷打盜砍。
人犯罪應枷責者。專汛官罰俸六月。人犯應發
河南山東者。專汛官罰俸一年。人犯應發湖廣
福建江西浙江江南者。專汛官降一級留任。人
犯應發雲南貴州廣東廣西者。專汛官降一級
調用。該管副將亦照前例分別議處。有能拏獲

者。亦照前例議敘。○十六年

諭。毓秀溫承惠奏查辦圍場北柵外店鋪窩鋪一摺。所有北柵外舊有大道旁開設各店鋪。即著照所議分別留存拆挪辦理。其該處租種蒙古地畝民人。亦應立定章程。不得在距柵木三十里以內招認開墾。搭蓋窩鋪。以杜偷漏圍場鹿隻茸角。嗣後距柵木三十里以內。有開設店鋪及開墾地畝者。如何責成查禁。其查禁不力之該管地方官。並招募民人開墾之蒙古札薩克章京等。作何查察查叅辦理。並著妥議章程具奏。○又定。圍場柵木三十里以內。該管地方武

職隨時稽察。如有民人開設店座。及蒙古王公等召募民人私墾地畝。該管官即拆毀驅逐。申報熱河都統。將蒙古王公等查叅。如地方官失於查察。別經發覺。照管理圍場章京員弁失察偷竊之例議處。失察開店及墾地人數。一名至五名者。罰俸六月。六名至十名者。罰俸一年。十名以上。降一級留任。二十名以上。降一級調用。三十名以上。降二級調用。如兵丁受賄縱容。無論名數多寡。該管官降一級調用。○道光三年奏定。

陵寢後龍風水禁內。盜賊潛入。偷砍海樹。查係紅椿界內者。將失察之專汎兼轄統轄各官均革職。兵丁責革治罪。總兵降三級調用。提督降二級調用。如係白椿界內者。將失察之專汎官革職。兵丁責革治罪。兼轄統轄官各降三級調用。總兵降二級調用。提督降一級調用。若係青椿界內者。將失察之專汎官降三級調用。兵丁責革治罪。兼轄統轄官降二級調用。總兵降一級調用。提督降一級留任。青椿以外官山界內者。將失察之專汎官降二級調用。兵丁責革。兼轄統轄

官降一級調用。總兵降一級留任。提督罰俸一年。至各界專汛失察。鄰汛拏獲盜犯者。除專汛官仍照本例議處外。其兼統及提督總兵各官。均照鄰境獲犯之例。減等議處。至汛弁得財包庇。或得財通信。致盜賊遠颺者。無論紅椿白椿青椿等處。均革職交刑部從重治罪。計贓以枉法從重論。如該管上司明知徇隱者。革職。若僅止失察者。照本例上加一等議處。其竊賊潛入並未傷損樹株。經別汛官兵拏獲者。將失察之專汛兼轄統轄各官。分別紅椿白椿青椿內外。

照鄰境獲犯例減等議處。○六年

諭。那彥成奏勘明

東陵風水重地。請添設紅椿以明禁限一摺。前據慶惠奏葦子峪門外。南自雁飛嶺起。北至低頭安止。請一律添設紅椿。當降旨令該督派員履勘。茲據查明該處樹株稠密。幾與民樹相連。自應明定界限。以昭慎重。著照所請。自雁飛嶺至低頭安十八里。在舊有火道之旁。添設紅椿五十四根。所需椿即由石門工部備辦。其紅椿火道以外。附近居民田園廬舍。相安已久。毋庸再添白椿青椿。以符定制。○又

諭慶惠奏拏獲偷牲匪犯。並究出弁兵勾結賄縱一摺。風水重地。附近居民肆行結夥弋獵。已屬藐法。外委崔思通及該處兵丁。巡查地方。是其專責。竟敢招致匪徒。引入紅椿以內。言明得牲後賣錢分贓。尤為可惡。經該總兵派委弁兵拏獲多名。究出實情。甚屬認真。可嘉之至。崔思通著革去經制外委。同兵丁楊大成。李秉端。及已獲賊犯何洪等十四名。並起獲鳥槍等件。均解交刑部嚴審定擬。在逃兵丁崔得玉。及偷牲首犯李五。並各逸犯。著飭屬嚴緝務獲。歸案懲辦。該匪犯兩次均由老廠溝所管地方偷入紅椿界內。